

浙江文叢

輿地紀勝

〔第三冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第三冊〕

卷第二十一至三十二

〔宋〕王象之 編著 趙一生 點校

輿地紀勝卷第二十一

江南東路

信州

上饒 饒江 靈鷲 靈山 龍虎 鉛山 玉溪

州沿革

信州，上。上饒郡，軍事。《九域志》。《禹貢》：揚州之域。《寰宇記》。吳地，斗之分野。《漢書·地理志》。又《後漢地理志》：『自斗十一度至婺女七度，一名須女，曰星紀之次。』總而言之，則曰斗之分；析而言之，則曰星紀之次。春秋戰國，迭爲吳、楚之地，秦屬九江、會稽二郡。《輿地廣記》。漢屬豫章郡之餘汗縣，此據《元和郡縣志》。又《寰宇記》以爲屬豫章郡之鄱陽縣，《元和志》以爲屬餘汗縣，然鄱陽在餘干之西，不應越餘干而專屬鄱陽。《寰宇記》非是，當從《元和志》。及會稽郡之太末縣。此據《輿地廣記》。按會稽諸縣，惟太末縣爲衢州，與信州相近，唐立州之時，割衢之常山、玉山二縣置信州，則當屬太末。三國時，又分鄱陽郡葛陽縣之地。此據《元和郡縣志》。又《寰宇記》以爲後漢建安十五年孫權置葛陽

縣，不當直指爲三國也。晉、宋及隋，屬鄱陽、東陽二郡。《輿地廣記》。陳改葛陽縣爲弋陽縣，今州理在弋陽縣東一百里。《元和郡縣志》。唐爲衢、饒、撫、建四州之地。乾元已前。後析饒之弋陽，衢之玉山、常山及建、撫二州之地置信州，因江淮轉運使元載之請，謂其信可美也，隸江西道。《太平御覽》在乾元元年。五代爲吳楊氏、唐李氏僞地。《圖經》。皇朝平江南，隸江東路。開寶八年。今領縣六，治上饒。

縣沿革

上饒縣，望。

倚郭。《元和郡縣志》云：『本吳所置，隋平陳，省。』《唐地理志》云：『武德四年復置，隸饒州，七年省入弋陽。乾元元年復置。』《輿地廣記》云：是年，并置信州。《寰宇記》云：『所謂上饒者，以其旁下饒州故也。』

玉山縣，望。

在州東北九十里。《寰宇記》：按《縣圖》云：『本漢鄱陽縣界之西鄙也，以境內有懷玉山，故以爲稱。』《元和郡縣志》云：『唐證聖元年，分常山、須江等縣置。乾元元年，自衢州割入信州。』

弋陽縣，望。

在州西一百六十里。《寰宇記》云：『建安十七年，孫權置鄱陽縣，又置葛陽縣。』《元和郡縣志》云：『後漢分餘汗縣東界立葛陽縣，自吳至陳並屬鄱陽郡。隋開皇中，因失印改爲弋陽縣，以地有弋水故也。乾元元年，自饒州割屬信州。』《輿地廣記》云：『有寶豐縣，慶曆三年又省入弋陽縣。』

貴溪縣，望。

在州西一百九十里。《寰宇記》云：『本漢豫章郡餘汗縣之地。』《元和郡縣志》云：『唐永泰元年，觀察使李勉奏割樂平、餘干二縣在貴溪口置，因以爲名。』

鉛山縣，中。

在州南八十里。《上饒志》云：『本建、撫二州之地，山產銅鉛，舊置銅場，以籠其利。後唐嘗析上饒、弋陽五鄉以爲場，保大二年升爲縣，屬信州。』《國朝會要》云：『開寶八年，平江南，直隸京師，後來隸有汭口鎮。』

永豐縣，中。

在州東南五十里。《輿地廣記》云：『唐乾元元年，析上饒置，屬信州。』《唐地理志》云：『乾元元年，置永豐。』

縣，元和七年省永豐，入上饒。』《國朝會要》云：「皇朝熙寧七年，以上饒縣永豐鎮升爲縣。」

風俗形勝

信美所稱，爲郡之名。見元載奏。川源夔遠，關防襟帶。《寰宇記》云：「〔上〕〔乾〕」元元年，江淮運使元載以鄱陽縣信美所稱，爲郡之名，宜置州制，可賜名信州，以信美所稱，爲郡之名。『山鬱珍奇。』《鄱陽記》云：「界內之山出銅及鉛鐵者，有玉山及懷玉〔石〕〔山〕」〔四〕。梁載言《十道志》所謂山鬱珍奇，蓋此類也。靈山爲州之鎮山，城南之山爲南屏。《上饒志》云：「靈山爲州之鎮山，而衆峰森聳天末，遠望色深碧，岡勢迤邐從北來，州宅實枕其趾，城南之山延袤周遭，號爲南屏，譙門又適相值。所謂上饒者，以其旁下饒州之故也。《晏公類要》。旁下饒州。《寰宇記》。在饒州之上，故曰上饒。《上饒志》。地控閩越，隣江淮，引二浙，隱然實要衝之會。韓元吉《修子城記》。福建、湖廣、江西諸道悉出其塗，昔爲左僻，今爲通要。《上饒志·風俗門》。信安之地，犬牙於閩。韓元吉《陶氏義居記》。地據江吳閩粵之交。元絳《題靈鷲寺序》。地介吳閩。龐藉《濟衆亭序》。信之山，富於巖岫而蓄於水泉。洪芻《石井泉記》。信於江南，爲四塞地。汪藻《示喜後樂二堂記》。當吳楚閩粵之交，爲東南望鎮。李尚書彌大《玉山法海院記》。常山至玉山八十里陸道，謂之玉山嶺。自玉山湖七百有一十里順流，謂之高溪。李習之《南來錄》。山川幽麗。《唐詩紀事·李華〈寄題趙七侍御〉》：「自餘干溪行，經弋陽至上饒山川幽麗，寄懷於詩篇。」

景物上

玉山

《九域志》。

玉溪

《九域志》。

鉛山

《寰宇記》云：『在縣西北七里，又名桂陽山。按《舊經》云：「山出鉛。」先置信州之時，百姓採鉛，什而稅一。建中（時）「元年」^{〔五〕}封禁。貞元（年）「間」^{〔六〕}置永平監。其山又出銅及青綠，又有寶山相連「桂陽山」，出銅。』

鐵山

《寰宇記》云：『在上饒東南七十里。又名丁溪山。舊嘗冶鐵于此。』

銅山

在上饒縣南四十餘里。《方輿記》云：『下有天井，廣一丈餘，有石倒墜如蓮花覆蓋，天欲雨，井中即有白霧上騰。』

錢倉

《寰宇記》云：『在弋陽縣。有石臨水如廩，高數丈，號曰錢倉。戶如六尺牀。晉太和中，有釣人從戶過，石開，其錢自出。』

神石

在弋陽縣東南。橫出大溪，捍截東流，縣治賴此無衝潰之患，故以神名。東壁巖壑奇秀，淵深魚聚，西南有湫可以艤舟，上有亭可眺，山回水長，晚碧相照，是為絕景。

仙巖

在貴溪縣南七十里。去龍虎山二里，峰巒削立，高出雲表，巖石嵌空，多為洞穴，房室、窻牖、牀榻、倉廩、棺槨、雞犬、禽鳥之狀，晁太史以為大水時人宅山上。所作詩云：『稽天巨浸洗南荒，上有千峰骨立僵。民未降邱應宅此，舉頭天壁有困倉。』

靈山

《寰宇記》云：『在上饒西北九十餘里。絕頂有葛仙壇。』丹竈諸峰七十二，上有龍池，產水晶。《九域志》云：亦名靈鷲山。韓元吉詩云：『諸峰七十二，磊砢略可推。定知水晶宮，閼藏神所司。』《舊經》云：上有龍池，多珍木奇卉，兼出水晶。荆公詩：『靈山寧與世爲仇，斤斧侵凌自不休。冰玉此來聞長價，市人無數起相讎。』

雲洞

在州南二十餘里。天欲雨則興雲。

月巖

在上饒縣西三十里。一名石橋山，巖半有穴穿出山背，遠望如月，故名月巖。《寰宇記》云：『山中壑穴如虹橋，然外窺如蓋，遠望如月，雖天台石橋，不足以比。』朱喬年郎中有詩云：『鑿透巉巖不記春，山腰千古掛冰輪。誰知擘破三峰手，聊出嬋娟戲路人。』

石鼓

《寰宇記》云：『在貴溪縣西五十里，有石如鼓。』《耆舊傳記》云：『鼓輒自鳴，兵氣之兆也。』

石堂

《寰宇記》云：『在貴溪縣南一百六十里。有石堂，中可坐數百人，云是鬼谷先生石堂。』

水亭

張（祐）〔祐〕^{〔七〕}有《題弋陽徐明（甫）〔府〕〔八〕水亭》詩。

石橋

在弋陽縣〔西〕^{〔九〕}南三十里。《鄱陽記》云：『寶峰〔一〇〕有石橋，長五十丈，廣二丈。』

石井

在鉛山縣東四里。資聖院之後，周迴六丈，深二三丈許，有巖去水二丈，三面回挹，瞰于井上，

石文隱起，錯鏤垂下如蓮花倒生。邑產膽水，味多澁濁，此泉清冷甘美，大旱不竭，溉田千餘頃，又名玉洞泉。

石巖

在玉山縣二十餘里。可容數百餘人。

沙溪

在玉山縣西三十里，有沙溪市。

洞巖

在玉山三十餘里。林壑掩映，崑石奇秀，俯身下四五尺，乃平寬可數十人坐。崑上垂乳如纓

絡，水流出，其聲清壯。越溪以往可行數里，其傍有尤美軒，取《醉翁亭記》『林壑尤美』之義爲名。汪端明有詩，其略云：『林巒獻狀環左右，煙雲變相隨高低。』程知縣詩云：『洞巖天下奇，超出滁諸峰。』

幽巖

在上饒月嵩雲洞側。

叫石 《寰宇記》云：在上饒縣西九十里。《舊經》載：元和侍御史許堯佐過石下，名之曰走石，嘗敘

《走石說》，刊于叫石之側。

響石 在弋陽縣南二十里。其廣可容萬人，聲傳響答，非有穴竅，蓋出自然。

南巖 《寰宇記》云：『在上饒縣十餘里。嵩傍巨石，儼然北向，其下寬平，可坐千人，士女遊賞之處。』

晁補之、韓無咎皆有詩。晁詩其略云：『崖奔木疎瘦，谷遠鳥幽怪。』韓詩云：『野棠著子梅杏老，密葉尚帶殘花紅。涓涓寒溜滴冰雪，一酌爲我凉心胸。』

西湖 在鉛山縣西一里^{〔一〕}。内生芰荷，傍多高柳，沙嶼曲折，景趣瀟灑。

蓮鑊 《鄱陽記》云：鄱陽嶺上多密嶠。宋元嘉中，有人見巖內有三鐵鑊，鑊可容百斛，中生蓮花，他日往尋，不知所在。

葛陂 按《費長房傳》，葛陂當在汝南，而弋陽有此名，其說非是。李泰伯有詩云：『長房化去已千年，鬼^{〔谷〕}怪^{〔一〕}紛紛不畏天。老鰲若來爲太守，何人殺向葛陂邊。』

葛溪 在弋陽。上有葛玄冢，故曰葛溪。荆公爲江東提刑時，寄沈鄱陽詩：『朝渡藤溪霜落後。』按《江東地志》無藤溪，豈誤以葛爲藤乎？

徐巖 在貴溪縣。員外郎徐紹景讀書之所。王荆公有贈徐詩云：『茂林脩竹翠紛紛，坐占山阿與水

潰。笑傲一生雖自樂，有司還欲選方聞。』其地林深水遠，洞穴幽邃，有巨石平坦突出山側，如月攀蘿，登之可以望遠。

章巖

在鉛山縣西北四十里。高一十餘丈，深六丈，僧屋崑下，名宣梵院。

璩嶺

在貴溪縣南八十里。或以爲據嶺，以閩越偏據時以此爲界。按南唐嘗命璩大夫守此，有祠堂在嶺西，嶺之得名以此。謂爲據者非。

婦石

在上饒縣。高五十丈。

師溪

在弋陽東南百餘里。《方輿記》云：昔有隱士居此，鄉人遠近皆師之。

象山

在貴溪縣。陸荆門嘗結廬其上，與四方從學者講習，以山形宛如象，遂以象山名之。

鵝湖

在鉛山縣西南十五里。《鄱陽記》云：山上有湖，多生蓮荷，一名荷湖山，今以鵝湖著。按《舊經》謂昔有龔氏居山傍，所蓄鵝逸于山，長育成群，復飛而下，因謂之鵝湖。俗傳唐僧大義禪師結庵，仙鵝自波而出者妄矣。道傍長松參翠，枝幹權奇，延袤十餘里，大義所種。有仁壽院，淳熙初年，東萊呂公、晦庵朱公、象山陸公曾相會講道此院，謂之鵝湖之會。

鶴山

在永豐縣。《方輿記》云：下有天井，廣二丈，有懸石如蓮花覆蓋，其水碧色，四時不減。

膽水

在鉛山。自昔無之，始因饒州布衣張甲獻言可用膽水浸鐵爲銅。紹聖元年，始令本州差廂軍興浸，其利漸興，今淋銅之所二百四槽，歲浸銅八萬九千斤。

景物下

襲芳齋

在郡宅。

浮香亭

在郡宅。

淨芳亭

在郡宅。

宣化堂

在郡宅。

中和堂

在郡宅。

覽悟齋

在郡宅。

面山堂

在郡宅。

愛山亭

在郡宅。

一覽堂

在郡宅。

兩賢堂

在上饒之廣教院。祀東萊呂舍人、贛川曾文清。

三老堂

在玉山縣之法海寺。畫維摩詰與南禪師、李尚書彌大三像。

翠微樓

在郡治後。

歸雲堂

在玉山縣之石僧院。汪端明詩云：『浮雲本無心，人心逐雲去。更作歸雲堂，雲歸竟何處。』

清風峽

在鉛山縣西北五里。嘉祐中，劉燁之道於所居之旁得土山，洗而出石，因以爲名。

曉翠軒 在光孝寺。

玉光亭 按《信州圖經》云：玉光亭在玉山縣廳之東。不知所自，章郇公及王荆公詩碑在焉。郇公詩云：『千層懷玉對軒窗，池上新亭號玉光。祇此便堪爲吏隱，神仙官職水雲鄉。』荆公詩云：『傳聞天玉此埋湮，千古誰分僞與真。每向小庭風月夜，卻疑山水有精神。』蜀人青陽楷詩云：『鳴琴賢宰有三長，吟得新詞敵夜光。好是斷章無以和，神仙官職水雲鄉。』和郇公韻也。

靈山閣 在祥符寺。晁太史詩云：『寶剎千尋出天外，靈山三面落樽前。』徐俯詩云：『遊客乍驚人外境，居僧初識面前山。』

禪月臺 在州水南景德寺，景趣甚幽。

天柱山 在鉛山縣東二十里。

雨石山 在永豐縣東南四十餘里。《舊經》云：歲旱，禱之多應，故名。山西有崑洞，有石如螭盤、虎跳、鶴立、鸞翔之狀。

聖井山 在貴溪縣南六十里。山有三井，其二在絕頂，人迹罕到，下一井泓澄不可測，歲旱禱之多應。

鬼谷山 在貴溪縣南八十里。道家以爲貴玄通真洞天是鬼谷先生所居之處。按《史記》徐廣注：潁川陽城有鬼谷。又按晉（泰）「太」^{〔三〕}康《秦地記》：扶風池陽縣有鬼谷。司馬彭云：鬼谷在高山。虞喜《志林》云在龍門。衆說不同，豈嘗居此耶？

自鳴山 在貴溪縣西七十里。《舊經》云：上有湖，中有藤圍丈餘，上干雲霄，枝葉四垂，天欲雨則水湧有聲，故名自鳴山。

弋陽館

張祜有《題弋陽館詩》，詳見詩門。

永豐溪

在永豐縣。與上饒江合流，又有永豐山，在縣西二十里。

弋溪水

在弋陽東二十里。有大石面，如鑄爲弋字。

貴溪山

在貴溪南二十里，鬼谷先生學道之處。

仙人城

在弋陽縣東四十里。《方輿記》云：山之峰壁高五十丈，形如層城，霞馭雲蔚，群仙之室，南

有屈曲而上，絕頂平坦，有池水清冷，亦名赭石。

正女石

在貴溪縣西三里，東臨大溪。《方輿記》云：昔有正女嘗浣于此。

紫溪嶺

在鉛山縣南四十里，高四百丈。又有紫溪水。

紫谿驛

陸游詩云：『嘉陵棧路吾能說，略似黃亭到紫溪。』紫谿在鉛山縣。

烏石山

在上饒縣南七十里。

黃石山

在玉山縣東南三十餘里，出黃默石。

懷玉山

在玉山縣北百餘里。一名玉斗，以山高近於斗，故也。

擣藥山

在弋陽縣東百餘里。上有擣藥石臼，傍有井，甘美，石橋長二十步，唐嘗置道士觀于此。

積翠巖

《寰宇記》：在貴溪縣西三十里。《方輿記》云：每蓄煙靄，與五面山相對。

待賓山

在弋陽縣，又名獅子巖。

望姑山

《寰宇記》云：『在貴溪縣西南六十里。』峰巒峭拔，下臨深淵。

緝女石

在上饒縣西三十餘里。《舊經》云：以其類工女之形，故名之。

纓績石

《寰宇記》云：『在上饒縣西九十里。孤石圓聳，獨在潭中，高十餘丈，如緝麻纓焉。』故老相傳云：織女失纓，流至此而止。

石泉洞

在弋陽縣北五十里。洞東有小穴，泉流滴乳，堅凝爲石，狀若列屏，若掩蔽洞戶者南北六十餘里，有房室坐卧之所，復有小穴漏明。

石城巖

在弋陽縣北六十里。其廣可容萬人，上有石乳，泉竇或方或長，下有仙人跡隱出石面，前環衆山可愛。

石黃山

孔雀院

《寰宇記》云：『在上饒東南三十五里。出燠黃石，人或採之，煉爲丹藥。』

在水南。後有泉，名蒙泉，晁太史有詩。

靈鷲山

在永豐縣東三十五里。有光相洞，其深不可窮。有寶積院，張忠文公叔夜（稽）〔四〕仲之墓在焉。寺之前有廟以祀張公，賜額爲旌忠。

龍虎山

在貴溪縣西南一百五里〔一五〕。《方輿記》云：兩石相峙，山峰屹立，狀若龍虎，乃漢張道陵所居處。

象樓山

《寰宇記》云：『在貴溪縣西南八十餘里。又名石樓山。』

龜峰山

在弋陽縣南二十餘里。山有三十二峰，中一峰如龜，唐乾寧中，僧茂蟾所開。

烏嶺山

在弋陽縣東一百餘里。

桃花臺

在弋陽縣西二十餘里。濱溪而高平，相傳昔有道士種桃，鍊丹于此。南望龜峰，屏列于前，

今有妙香僧寺。

桃源院

在弋陽縣。有東牟王右史詩云：『誰道桃源解迷路，與君平步到煙霞。』

葛溪驛

按信州弋陽縣有葛溪水，源出上饒縣靈山。又有葛玄仙翁冢焉，因名葛溪。荆公《葛溪驛》

詩：『缺月昏昏漏未央，一燈明滅照秋牀。病身最覺風霜早，歸夢不知山水長。坐感歲時歌慷慨，起看天地色淒涼。鳴蟬更亂行人耳，正抱疎桐葉半黃。』

瑞峰院

在玉山縣。吳炳不知何代人，有詩云：『尖峰峰上寺，臺殿倚雲端。屏障畫雖易，輪蹄來亦

難。沾衣嵐氣潤，洗夢水聲寒。寄語參禪子，須同四絕看。』

銅寶山

在鉛山縣西南七里。

鍾石灘

在上饒縣西八十里。

羅塘水

在貴溪縣。發源自邵武軍，流百里至中溪渡合流。

水南山

在玉山縣溪南，俗呼大王山，又呼武安山，並溪多石，山巔有浮圖，有超覽亭，山半有半山亭。

軍陽山

在弋陽縣南三十里。《舊經》云：高百餘丈。《方輿記》云：昔有將兵屯於此山之陽，因以

名，又嘗爲寶豐鎮。

西際院

在上饒。王右史詩云：『有僧眠雪月，無客賞風花。』

南屏山

在上饒縣。自廣信門絕浮梁以南皆其地，有峰尖聳，名狼牙尖。其山由東南以來，爲波濤起

伏之狀，及州治前則周環拱護，秀潤之氣可挹。下有祥符寺、景德寺、大霞宮、草衣寺、靈山閣及跨鶴臺。

上干溪

《舊經》云：玉山有玉溪。《上饒志》云：上干溪所經處，間與衢之常山接，自信而衢，不可舟

行而間以陸運者，此而已矣。知縣汪杞嘗欲浚鑿使之通流，以工役不貲而止。

上饒江

《寰宇記》云：『出懷玉山，分流兩道，一東入衢州常山縣，入浙江；一西南從玉山縣過，合

（綸）「淪」〔六〕溪。』

大琛山

在上饒縣。元和中，許堯佐爲文敘之曰：縣有山人見三鐵鑊，可容百斛，中生蓮花。

雙門嶺

《寰宇記》云：『在永豐故縣東三十里。』雙峰如門，因名。

三峰山

在貴溪縣西南二里。三峰相並，高三十餘丈，東連王表巖，西接五面山，南北孤絕。

五面山

在貴溪縣西南。《方輿記》云：南一峰屹立，削成五面，欲登峰頂，必泛貴溪而入，攀蘿葛乃

可上。

六石山

在永豐縣東七十里。六峰相連，故名六石。

九子石

《寰宇記》云：『在弋陽縣水岸間。』

百丈嶺

在貴溪縣北七十里。有路自此通饒、徽。《鄱陽記》云：長沙王屯兵於百丈嶺，即此。

馨香巖

《九域志》引《鄱陽記》云：『許旌陽斬蛟於此巖下。』

信義港

在弋陽縣。《方輿記》云：土地良沃，人多信義。

仁壽院

在鉛山縣。有江隣幾所作《三門記》，又曾鞏亦有《記》，葉夢得有詩。

丫頭巖

在弋陽縣西六十里。有大山岐首，故名。

醺口水

在貴溪縣。出醺口，歷仙巖。

太甲山

在玉山縣北二十里。

王真巖

在貴溪縣南二里。按《舊經》謂之王表巖，謂表因世亂率村間數十家避於此。後有野僧開

創林穴，棲息其中。晁補之有詩云：『鬼谷西來一丈清，三山箕拱慰高情。時平尚欲依王表，南斗逍遙畢此生。』

王表巖

在貴溪縣南二里。昔有王表於此避亂，今有招真觀存。

宋氏水

在上饒縣西五十里。《舊經》云：昔有宋氏居此溪側，唐天寶敕改今名。

古跡

孚惠廟

在貴溪之白鳴山。世傳以爲石勒之姪及石勒之子。按石勒未嘗至江南，惟永興中，季龍與勒相失後，劉琨送勒母及季龍于葛陂，時年十七。惟葛陂與弋陽地名相亂，意其附會云。

陸鴻漸宅

《寰宇記》：『在上饒縣東五里。』

谷隱堂

故尚書郎東萊呂（丕）「好」問所居也。（丕）「好」問在中原時，其居名谷隱，後居玉山，亦名其堂曰谷隱。其猶子居仁嘗爲賦詩云：『客舟不顧生事窘，所至有堂名谷隱。』

魚計亭

東里趙觀嘗爲元祐館職，子慶澤、孫渙皆有文，總名之曰《趙氏四世集》。觀居鄭州，有魚計亭，而觀之子賜以提點坑冶，來居于玉山，亦作亭名曰魚計亭，有《魚計亭賦》。

經綸堂

在鉛山縣南三十里崇壽院。祥符四年，龐莊敏公籍侍父格蒞是邑征官，寓學此院，後爲丞相邦人，因舊館爲經綸堂。